

Präzis 400 Johr isch s här
do git s in Basel s Militär
und d Stänzler, d Standeskompanie
zieht in unsri Uni y
denn statt am Petersplatz z studiere
duet me dert no exerziere

Vor däre Zyt herrscht Anarchie
und kain kä z Basel sicher sy
gosch als z Nacht dur d Staine dure
griegsch bestimmt e baar uff d Schnuure
und am Voltaplatz am drey
laufsch in e Mässerstächerey
im De Wette-Pärggli wirsch misshandelt
s Rhybord wird mit Drägg verschandelt
nimmt e Ma e Frau mit Gwalt
denn sait s Gricht, so isch es halt
wottschi am Märtplatz go flaniere
dien dy Bättler schikaniere
und am Samschdig vor de Viere
brucht me d Stadt zem demonstriere

D Stänzler mache däm Verdruss
sächzähzwaiezwanzig Schluss
Halt, do stimmt doch ebbis nit
well s die Zueständ hitt no git
denn Bolizei und Militär
hänn s scho immer z Basel schwär
me rief sy zwor ins Gundeli
verschwindet dert e Hundeli
hebsch e Fuess in d Velospur
kemme sy in Vollmontur
und Versterggig wird schnäll gholt
wenn ain e Drämmli iberholt
blybsch bim Bier voruss z lang sitze
kemme si zem d Nachtruh schitze
nur d Chaote losst me wiete
s Heidi Mück duet si behiete

Aimol hätt me, Ma fir Ma
d Stänzler wirgglig miesse ha
dert wo d Buure rebelliere
und zur Hülfteschanz marschiere
doch bis Basel reagiert
wird vo Lieschtel us regiirt
d Luft isch kurz druff abe duss
mit dr Stadtwach isch denn Schluss
fascht wurd d Stänzler-Gschicht do ände
liesste mir s mit däm bewände
s puri Gegedail isch gscheh
vor hundert Johr hett d BMG
d Idee, die Stänzler z ibernäh
und e Perspektive z gäh

Vom Nordkap bis an Tegernsee
ka me hitte d Stänzler gseh
plansch emol e richtig Fescht
denn muesch d Stänzler ha als Gescht
wenn dr Franz e Velo kauft
und s ney Gartehysli dauft
gänn sich d Schwinger uff dr Ranze
wott d Frau Käller Ginkos pflanze
wenn d Mäss d Uhremäss versänggt
und druff abe d Art verschänggt
losst s dr Johnson richtig krache
wott dr Pierin Spese mache
wenn dr Murer d Trychler fyrt
Dytschland druff dr Olaf kyrt
wemme s Härzstigg ändlig startet
oder z letschemänd doch wartet
wenn dr letschti Parkplatz stirbt
d Stadt für d Rächt vo Affe wirbt
wenn in Eestrych s Kurz-Spiil ändet
dr Schawinski nimme sändet
d Baerbock d Biecher salber schrybt
und dr Burgener nimm blybt

S isch die alti Stadtwach hitt
e Musik-Corps, wo d Stadt vertritt
wottschi e Stänzler-Uftritt gseh
waisch, dä ghert zer BMG
d Zyt als Standeskompanie
isch bi de Stänzler lengscht verby
statt d Basler Bolizei go z laite
wänn d Stänzler hitt nur Fraid verbraite

Denn
Rings um uns gsehsch nur no Kryse
Wo n ys s Läbe wänn vermyse
Birgerkrieg im Südsudan
Taliban z Afghanistan
Menscherächt bim Erdogan
Kindsmisbruch bim Vatikan
Ajatollahs z Teheran
Drohgebärde vor Taiwan
und denn kunnt no d Pandemie
doch die Zyt isch jetz verby

Wenn mir sunscht au karikiere
und was schlächt isch kritisiere
wämmer das Johr aifach Spass
drum Ihr Narre: Ab uff d Gass

Wenn mir sunscht au karikiere
und was schlächt isch kritisiere
wämmer das Johr aifach Spass
drum Ihr Narre: Ab uff d Gass



Nochhaltigkait
Dä Zeedel isch mit numme 26 Buechstabe gschriben worde, wo die maischte mehreri Mol brucht worde sinn

LÄNGMER S GUEHR!
W U W U . B M G 1 9 O 7 . C H



Zusatz

Ministerium

Geheimes

